



ULINZI WA MASHAHIDI NCHINI KENYA



TAFSIRI ILIYOFUPISHWA YA SHERIA YA KULINDA MASHAHIDI YA KENYA, 2010

Imeandaliwa na Wakala ya kulinda mashahidi nchini Kenya



ULINZI WA MASHAHIDI NCHINI KENYA

Sheria ya kulinda mashahidi Na. 16 ya 2006 kama ilivyorekebisha na sheria Na.2 ya 2010 ni nini?

Sheria ya kulinda mashahidi, 2006 (kama ilivyorekebisha na sheria Na. 2 ya 2010) ni sheria ya Bunge la Kenya inayotawala ulinzi wa mashahidi ambao wametishwa kwa kushirikiana na maafisa wa utekelezaji wa sheria na kutoa mwongozo ulio wazi kuhusu nani aliyehitimu kupata hifadhi. Sheria hii pia ndiyo iliyoanzisha Wakala ya kuhifadhi mashahidi nchini Kenya ambayo itasimamia uhifadhi wa mashahidi na kutoa maelezo kamili juu ya Wakala yenyewe, shughuli zake, inavyoendeshwa na wanaowajibika kutimiza majukumu yake.

Nani anayehitimu kupata hifadhi?

Mtu huhitimu kupata hifadhi:

- Iwapo ametoa au amekubali kutoa ushahidi kwa niaba ya serikali
- Iwapo ametoa ripoti kuhusu uhalifu kwa polisi au Taasisi yoyote inayohusika na utekelezaji wa sheria
- Iwapo anahitajika kutoa ushahidi mbele ya mahakama, tume au baraza la hukumu nje ya nchi
- Iwapo ana uhusiano na shahidi anayehitaji hifadhi
- Iwapo anahitaji hifadhi kwa sababu yoyote nyingine chini ya sheria hii

Kama shahidi, mtu huhitimu kupata hifadhi:

- Kutegemea ushahidi wake
- Iwapo kuna tishio juu ya maisha yake kwa sababu ya kuwa shahidi muhimu katika kesi fulani

Nani hutoa hifadhi?

Mashahidi hupewa hifadhi na Wakala wa kulinda mashahidi nchini Kenya.

Mtu huingiaje katika mpango wa kuhifadhi mashahidi?

Mkurugenzi wa Wakala ataamua ukubalifu wa aliyetuma maombi ya kupata hifadhi na aina ya hifadhi atakayopewa. Ukubalifu huu utategemea utaratibu na kigezo maalum. Anayeomba hifadhi atahitajika kujaza fomu zifaazo za maombi.

Wakala hii huendeshaje shughuli zake?

- Wakala ya kuhifadhi mashahidi nchini Kenya ni shirika huru kumaanisha kwamba hakuna anayeweza kuingilia shughuli zake.
- Wakala inawajibika kutoa hifadhi maalum kwa watu ambao wana habari muhimu na ambao waweza kuwa hatarini au wanatishwa kwa kusaidiana na idara ya mashtaka,

Kuhusu Wakala ya kulinda mashahidi nchini Kenya

polisi au wakala yoyote ya utekelezaji wa sheria.

- Kama sehemu ya utendakazi wake, Wakala itadumisha mfumo wa kuhifadhi na kuchukua hatua mwafaka na thabiti kuhakikisha usalama na ustawi wa waliopewa hifadhi.
- Wakala ina Wafanyakazi weledi na mabingwa wanaowajibika kuendesha shughuli zake za kila siku.



- Mkurugenzi wa Wakala huhakikisha wafanyakazi wanawalinda mashahidi na Wakala inaendesha kwa ustadi na umadhubuti
- Wakala inawajibika kutoa ripoti kwa waziri anayehusika na mambo ya kulinda mashahidi juu ya utendakazi wake.
- Bodi ya ushauri ya Wakala ya kuhifadhi mashahidi hushauri kuhusu jinsi ya kutumia mamlaka katika utekelezaji wa majukumu ya Wakala kulingana na sheria

Je, mashahidi hupata hifadhi na huduma za aina gani?

Wakala hutekeleza yafuatayo:

- Huwalinda mashahidi kwa kutumia silaha
- Huhamisha mashahidi

- Huwasaidia mashahidi kubadilisha vitambulisho vyao; au
- Huchukua hatua nyingine yoyote ifaayo kuhakikisha usalama wa anayepewa hifadhi

Mashahidi hulindwaje kesi inapoendelea?

Wakala huweza kuomba mahakama:

- Kusikiliza ushahidi faraghani au kwa vikao vilivyofungwa
- Kuwaruhusu mashahidi kutumia majina tofauti badala ya majina yao halisi
- Kuficha habari/taarifa fulani inayoweza kurahisisha kutambulika kwa shahidi
- Kutumia mitambo ya video; au
- Kutumia mbinu za kuficha au kufunika utambulisho wa shahidi.

Ni yapi mengine yanayotekelezwa na Wakala ya kuhifadhi mashahidi?

Kutoa ushauri

- Wakala yaweza kutoa ushauri kwa wizara, idara, wakala za serikali au mtu yeyote, panapo haja, juu ya mikakati ya uhifadhi wa mashahidi.

Kusimamia hazina ya kufidia waathiriwa/wahanga

- Wakala ina jukumu la kusimamia hazina ya kufidia waathiriwa/wahanga. Hazina hii hutumika kuwafidia waathiriwa au familia zao kutokana na uhalifu dhidi ya mtu aliyekuwa katika hifadhi ya Wakala. Vile vile itafidia kifo cha mwathiriwa aliyeuliwa akiwa katika hifadhi ya Wakala.

Shahidi au mtu yeyote atayaelekeza wapi malalamishi dhidi ya Wakala?

Iwapo shahidi au yeyote ana malalamishi dhidi ya Wakala ya kuhifadhi mashahidi, anaweza kuyaelekeza kwa mahakama ya

rufaa ya hifadhi ya mashahidi iliyoanzishwa kwa mujibu wa sheria ya kuhifadhi mashahidi.

Mahakama hii ina jukumu la kuchunguza na kutoa maamuzi kuhusu malalamishi ya watu

ambao hawakuridhishwa na maamuzi au amri za Wakala kuhusu mhanga wa uhalifu dhidi ya kuhifadhi mashahidi. Vilevile itafidia kifo cha mhanga aliyeuliwa akilindwa na Wakala.

Kanuni Za Kulinda Mashahidi Notisi Ya Kisheria Na. 99 Ya 2010

Kanuni za kulinda mashahidi ni nini?

Hizi ni kanuni zilizoanzishwa chini ya sheria ili kutoa mwongozo wa jinsi ya kuomba hifadhi kama shahidi, fomu za kujazwa, aina za mikataba ya kutiwa sahihi kati ya Wakala na shahidi anayelindwa na mwenendo wa anayelindwa.

Matarajio kutoka kwa wafanyakazi

Wafanyakazi wanatarajiwa kudumisha uaminifu na kutopendelea wakati wowote. Sharti waelimishwe ili kuhakikisha usalama, uadilifu na heshima ya mashahidi na kujali jinsia zao katika hatua zote za kesi na hata baadaye.

Mahitaji ya watoto na wazee

Mahitaji ya watoto, wazee na watu walio na ulemavu sharti yashughulikiwe.

Maombi ya kuhifadhiwa kama shahidi

Ombi la kupata hifadhi chini ya mpango wa kuhifadhi mashahidi laweza kufanywa kama ilivyoelezwa katika sheria. Fomu zifaazo zaweza kupatikana katika ofisi za Wakala. Mkurugenzi anaweza kuidhinisha au kukataa ombi la shahidi yeyote.

Kujumuishwa katika mpango na kuhamishwa kwa mashahidi

Kutakuwa na mkataba wa maelewano kati ya mkurugenzi na mashahidi. Maelewano haya yaweza kuhusu maafikiano ya uhamisho iwapo patatokea haja.

Maagizo kwa mashahidi wanaolindwa

Mashahidi wanaolindwa wanapewa maagizo mwafaka ili kuhakikisha usalama wao, wa maafisa na mtu mwingine yeyote.

Wajibu wa mkurugenzi wa Wakala na usaidizi wa kifedha kwa mashahidi

Kanuni zinaangazia wajibu wa mkurugenzi wa Wakala wa kutoa usaidizi wa kifedha kwa mashahidi wanaolindwa, ukiwepo wa mavazi na mahitaji mengine.

Sheria na masharti

Kutofuata kanuni za Wakala kutasababisha kuchukuliwa kwa hatua za kinidhamu kama zitakavyoamuliwa na mkurugenzi.

Wakala ya Kuhifadhi Mashahidi
S.L.P. 28801 – 00100
Nairobi, Kenya
Simu: +254 712 1337/ +254 712 1338

Simu ya Dharura/Moja kwa Moja:
+254 71 122 244/ +254 72 522 2442
+254 412 013 747
Barua pepe: wpakenya@gmail.com

Ofisi ya Uhusiano
Mahakama ya Milimani
Ghorofa ya nne
Chumba Na. 413